



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 3

Neeraj Chopra Diamond League
Lausanne Leg nung asayatsü

Amit Shah-i Gujarat nung yipru agi
kongshiba tesemtem semdang



VOL. XX NO. 245 (ADOK 245) DIMAPUR MUNGNU (SUNDAY)

AAMI (JUNE) 18 2023

₹ 5.00

Manipur BJP MLA temi PM Modi den ajuruteptsü

Imphal, June 17, 2023 (Agencies): Manipur nungi BJP MLA aika Prime Minister Narendra Modi aser tanga central leaders den osang lemsateptsü atema Delhi nung oa lir.

Parnok Hokolbarnü Delhi atong aser PM Modi den ajuruteptsü atema appointment atar.

"Onoki Prime Minister Narendra Modi den ajuruteptsü atema atar aser tanü mesüra asing mapang angutsü imlar" ta Heirok MLA Thokchom Radheshyam-i ashi.

Iba telok nung BJP MLA tem-Dr Y Radheshyam, Karam Shyam, T Robindro, Kh Raghmani, T Brojen, S Kebi Devi aser Independent MLA Nishikanta Sapam nung dena lir ta Radheshyam-i ashi.

Manipur nung yimjung benr

arutsü atema onoki PM Modi dang mepishinür ta paisa ashi.

"Lanurtem ya asen tarutsü lir saka tanü education & communication maliba ajanga tarutsü mali kümogo. Ozü rongsenketzung nung timtem ajuruogo aser relief camp nung alirtem tzungluruwa aruba ajanga timtemer. Ano tasü mangtem morgue nung dang yua lir" ta Radheshyam-i ashi.

"Anungji Manipur nung President's Rule benoktsü asü masü central leadership-i dang lemtettsüla saka onoki tekaratiba nung yimjung aginür" ta paisa shisem.

Osang angazükba agi Manipur Legislative Assembly speaker Th Satyabrata aser social welfare minister H Dingo Singh nati anir ano telok ka Hokolbarnü Delhi nung oa lir.

Assam tzümetsüng ajanga nisung 3,857 timtemer

Guwahati, June 17, 2023 (Agencies): Assam nung June 17 tashi nung yimtsüng 146 tashi tzümetsüng agi kongshia lir ta Flood Reporting and Information Management system ajanga metetdaksü.

Tzümetsüng agi tamajungtiba kongshiba district ji Biswanath lir aser iba district nung nisung 3,857 timtemer.

Biswanath district nung kibong aika pei ki toktsür temporary shelters nung jenoka lir.

Külen, administration aser disaster response teams-i akokba tashi teyari agütsütsü meranga

inyakdar aser district tem nung relief camps aser distribution centers lapokogo.

Biswanath nung camp 4 aser Dibrugarh, Lakhimpur, Tinsukia o Udalguri nung kaka lapoka lir.

Tzümetsüng ajanga alu aser shirurtem alidak mobangogo aser iba ajanga shirurtem talidak maka kümogo. Taküm tzümetsüng ajanga shiruru 11,980 tashi kongshiogo.

Tzunglu kanga aruba ajanga Guwahati kübok Dhirenpara aser Sonali Path nung anentsüh lendong tulu ka atalok aser idangji arishi küm 35 tain Muktar Ali asü.

Mizoram-i Centre dang Rs 10 crore teyari meshir

Aizawl, June 17, 2023 (Agencies): Mizoram sorkari Centre dang Manipur nungi aruba nisung 11,000 yaritsü atema Rs 10 crore teyari meshiogo.

Mizoram state sorkar teshimtet telok kati Delhi nung Union Home Secretary Ajay Kumar Bhalla den ajurutepdang tekaratiba nung sen agütsütsü ayongzük, ta Tourism minister Robert Romawia Royte-i ashi.

Centre-i tekaraba nung relief package agütsütsü ta Bhalla-i Royte dang langzü.

Iba mapang Royte-i Bhalla dang Manipur nungi tetsür, tanur aser taintem parnok 11,000 tema Mizoram nung arua jenoka lir ta ashi.

State sorkar, NGOs aser arogotemi parnok nem teyari agüja arur, ta paisa ashi.

Mizoram-i Centre teyari kanga nungdaker aser Manipur nungi arur nem teyari magütsür state sorkari tebilemstü khuret tulu ajurutsü akok ta Royte-isa ashi.

Paisa Centre dang Manipur

nung tensa süngjemdaksütsü asoshi inyaktsü ayongzük.

Hokolbar tashi nung Manipur nungi nisung 11,503 tashi Mizoram nung arua jenoka lir ta state home department-i metetdaksü.

Manipur nungi arur nisung 8,634 tashi tangalen jenoka lir aser nisung 2,869 tashi sorkar aser yimtsüngtem lapokba relief camp 35 nung jenoka lir ta home department-isa ashi.

Assam den arrtsüa aliba Kolasib district nung nisung teimtiba jenoka lir. Iba district nung nisung 4,109, iba sülen Aizawl district nung nisung 3,825 aser Saitual district nung nisung 2,809 jenoka lir ta parnokisa ashi.

Manipur nungi jena arurtem ya Kuki-Hmar-Zomi-Mizo nung lir aser parnok ya Mizo nung den tesendakap lir.

Mizoram kübok district ana-Aizawl aser Saitual ajanga Manipur kübok Churachandpur aser Pherzawl district tem den kilometer 90 agi arrtsütepa lir.

DZAOT-i UPSC tatidang nung takok angurtem tushi, Takok yabo Tsüngrem nungi dang lir : Yimkü, Imkongnükla & Aotula



June 17 Küptoknü Dimapur nung Dimapur Zone Ao Officers' Telongjemi ayongzükba tetushi agütsüba sentong nung (abelenlen nungi-) Limasunep Jamir IPS, Aotula Ozüküm, Imkongnükla Ao aser Yimkü I Ozüküm nungertem agiba noksa ka yangi angur.

Dimapur, June 17 (TYO) : Union Public Service Commission (UPSC)-i linük nung nübortem tenzüksü atema tongti ketdangsertem shimba tatidang agiba nung tawa Ao kin nungi takok tulu angur par asem tushiba sentong tajung ka tanü yangi Forest Office complex nung Dimapur Zone Ao Officers' Telongjemi ayongzükba agiogo.

Iba sentong nung UPSC tatidang nung takok angur par asem, Kr. W.Aotula Ozüküm, Kr. Imkongnükla Ao aser Sp. Yimkü I Ozüküm nungertem ajaki parnok takok angubaji Tsüngremi nungi

lir ta tamasa Tsüngrem nem tenütsang agütsür külenang par tsürabur, tesayur, kinunger aser teyari agütsü.

Parnok ajak ya mezüng tatidang agütsüba nung takok angurtem masü saka tsüraburtemi yariba den parnok dak temulungtetba tulu aliba agi tezümedangi merangjen meranger anguba senti takoktem lir ta parnokisa shisem.

Yaküm küm parnok UPSC agütsütsü atema India ajunga nungi tenüng agütsür nisung lakh 11 shi liasü aser item rongnungi nübortem tenzükba mapa tapu

balala nung shimteter aser takok angurtemjibo noklang nung 0.01% dang lir, anungji takok ya meranga azüngba kisüng agi masü saka Tsüngremi yariba ajanga lir, kechiyong merangabo ajaki azünger ta par asem rongnung Sp. Yimkü I Ozükümi metetdaksü.

Paisa lanurtem dang UPSC tatidang ama nung takok angutsü atema tanü putu tensa nungdakba reprangteta Science, Maths aser technology tsütsü tali temulung tagütsüba agüja azüngtsüla ta sayulen ka agütsü.

(Maneni tapak 2 nung...)

Manipur nung Opposition party 10-i PM Modi den ajurutepnür

New Delhi, June 17, 2023 (Agencies): Manipur nung Congress dena kasa tangatetba aliba political party 10-i Prime Minister Narendra Modi aitsüogo.

"Manipur nung opposition party 10-i Prime Minister den ajuruteptsü atema atar. Congress, JD(U), CPI, CPI(M), Trinamool Congress, AAP, All India Forward Bloc, Shiv Sena (UBT), NCP aser Revolutionary Socialist Party-i PM Modi den ajurutepnür saka telangzüba kecha mangu lir" ta Congress general secretary Jairam Ramesh-i ashi.

"PM Modi-i June 20 nü US-i aotsü sentong lir aser aji matongdang pai opposition party

tem den ajuruteptsü imlar" ta Ramesh-isa ashi.

Opposition party nungi lennir ajak New Delhi mongdar aser June 20 tashi Prime Minister den ajuruteptsü atema atatsü.

"Küm 22 tejekdang June 18, 2001 nung Manipur tensa kanga mejungi aküm. Assembly Speaker indang bungalow, CM Secretariat rongdoktsü aser ita asem ser tesadang tashi state mokdanga liasü. Iba mapang party ajaki akhangba ama taoba Prime Minister Atal Bihari Vajpayee-i all-party senden anaben tashi ayonga amen aser pai yimjung alitsü mepishia liasü" ta Ramesh-isa Centre nung BJP sorkar aija ashi.

"Ajisüaka tanü party 10-i PM Modi den ajuruteptsü atar saka pa ola madoker" ta Rajya Sabha MP Ramesh-isa metetdaksü.

June 24, 2001 nü Manipur nungi party ajak teshimtet telok kati Prime Minister den ajurutept aser iba ya lendong ataloker anogo 6 nü buba nung liasü ta paisa ashi.

"Taoba Home Minister L.K. Advani-i bendangleni maodang July 8 nü all-party delegation den ajurutept aser Prime Minister Vajpayee-i ano maneni tensa meraksatsü aser ketdangpurtem den tensa süngjemba mapa nung yariteptsü ayongzükba liasü" ta Ramesh-isa shisem.

(Maneni tapak 2 nung...)

Nisung kari ANTA Hq Kohima office raksatsü

Kohima, June 17, 2023 (TYO): Mejangjatetba nisung kari Honibarnü All Nagaland Taxi Association (ANTA) Headquarters Kohima raksatsü.

ANTA-i annual tax magütsüba atema mejangjatetba nisung kari prangpong agi general secretary tuieter office raksatsüba osang angazük. Iba lendong ya taonung 6:00 ako meta atalok aser iba mapang office nung ANTA Hq Kohima general secretary Meyieho Hibo kisüng dang liasü.

Pai office shibangtsüba lia office CCTV nungi nisung ana parnok office-i aruba angu. Iba sülen nisung ka pa indang office-i arur telok tenüng kecha meshii dang annual tax meshi ta Hibo-i osangbener dang ashi.

ANTA 'sorkar ka, saru ka' ta asüba tangatetba nung noktaka lir anungji magütsütettsü ta Hibo-i nisungba dangji ashi.

Ajisüaka, iba nisung jagi pistol ka agiet aser Hibo dak tuieter jaraleni pa nung ar ao aser nisung kar office telungi aiter ANTA office furniture, computer set aser tanga kulikakettem raksatsü.

Pa indang takdangi mezüng aiba nisung tejakji meblemtemter ta Hibo-isa ashi.

Iba dak sendakba nung North Police Station nung ken o ka benokogo aser aibelenerem aputsü atema bushisüngdang tenzükogo.

ANTA-i 'sorkar ka, saru ka' ta asüba tangatetba nung ajemdaker yaküm nungi telungpur telok shinga nema tax

magütsür. Külen, Kohima jila nung aliba dokantem nungi tashiyim agi sen meshia senzür nisung asem ANTA Action Committee züngsemtem apu.

Ajisüaka, iba osang zülü tashi nung ANTA office raksatsür nisung asem indang maitsü mejangjatet lir.

ANTA Hq Kohima president Dziesevituo Solo-i iba tatalokba khukhua aitsüogo aser iba ama mapa inyakba magizüker ta shiogo.

"Ozü ketdangpur ka dak prangpong agi tuita merenshiba aser office raksatsüba aser office raksatsüba magizüker aser onoki sanen luden senden ka amending kechi inyaktsü'ar lemtettsü" ta Solo-i ashi.

Mokokchung DPDB senden menogo



June 17 nü DC office nung Deputy Commissioner & Vice-Chairman, DPDB, Mokokchung, Thsuvise Phoji, lenisüba nung Mokokchung DPDB senden amenba noksa nung angur.

Dimapur, Aami/June 17 (TYO): Ita shia amenba Mokokchung District Planning and Development Board (DPDB) senden June 17 nü Deputy Commissioner & Vice-Chairman, DPDB, Mokokchung, Thsuvise Phoji lenisüba nung menogo.

Mokokchung Deputy Commissioner tasenbai züngsemtem pelashishia

agizükba mapang ashiba agi, pai züngsem mashi ka den par kidang mesüra office nung mena sensaksemstü aser shisatsü lemsateptsü renema lir ta ashi.

Taoba senden indang minutes lepareprangshiba mapang DFO Mokokchung-i, tzüpokdak aser tzüputem mesemtetshiba (World Environment Day amungba mapang benoka inyaksangshiba

sentong ka) indang metetdaksü. Iba inyakyim ya DPDB, Mokokchung mendenbuba aser district kübok line department temi achaayanga inyaka liasü.

Senden nungsa Aliba yimtsüng nung "Patir Jupang" ta nungja agütsür lokti tentet ka züngoksemstü atema agizüka sorkar dangi abentsü telemtetba agi.

Longleng SP-i miim chisemba indang ken o jangjashitsü

Dimapur, Aami/June 17 (TYO): June 16 nü Pongching aser Longleng yimtsüng nungi yikdaklir kar ango achiba sülen miim chisema temang nung timtem adokba indang osang Longleng SP-i jangjashitsüogo.

April 16 nü 11:00 ako meta source balala ajanga Pongching aser Longleng yimtsüng nungi nüburttem miim chisemba indang osang angazüka liasü. Maneni source ajangsa shirangertem kar District Hospital Longleng nung temang anepaludar ta osang agütsü.

Osang angazükba sülen SP Longleng, OC Police District Hospital Longleng-i ken o bushisüngdangtsü atema ao. Mozüki atongba sülen nisung 43

tashi saksüpokshi agi tonger aliba nguteta liasü. Ken o ashishiba mapang June 14 nü Pongching yimtsüng nungi nising 60 nungi 70 tsüngda kati local dokan kibur ka ket nungi chiyongtsü (ango) kar alia liasü kechiyong parnok tasüngnü tzülü aotsü liasü.

June 15 nü ango ya kar soa achi, ajüsüaka ango achiba sülen nikongtsütsü aser aonung temang nung timtem agütsü tenzük aser ango achirtem tepok aoba den tepok shia liasü anungji parnok temang anepalutsü atema mozükidangi ao.

Food safety Department aser Chamber of Commerce Longleng nungi lenirtemi Police

aser civil administration den District Hospital semdang. Parnoki shirangrtemi soa achiba ango sor aliba indang sample aser kasa supply nungi asoba anog tayoker ket nungi meshi. Iba sülen sample tem ya asadangtsü atema State Public Health laboratory-i yoka liasü.

Maneni Doctor tem, nüburttem aser dokan kiburi kuli agütsübatem mangaoka yuogo aser iba doka shibangtsüogo, ta SP-i metetdaksü.

Ken o maneni bushisüngdangdar aser nüburttem dang ketdangsurtem den teka amteper inyaksü aser olulu osang meperokshitsü atema mepeshia metetdaksüogo.

Longleng nung ango metsürtem nem training agütsü

Dimapur, Aami/June 17 (TYO): Department of Fisheries and Aquatic Resources-i ayongzüka June 16 nü Longleng district, Tamlu block nung ango metsüba dak sendakba nung training sentong

ka ayongzüka katsüogo. Iba training sentong ya Education, Training & Extension Program kübok ayongzüka agiogo.

Iba training sentong nung ajak senteper nisung 30-i

shilem agia liasü. D Manpa Phom FI aser W Ongtang Phom AFI nati Pond Management aser Composite Fish Culture onük dak ajemdaker tangazükba agüja liasü.

DZAOT-i UPSC tatidang nung takok...

(TAPAK 1 NUNGI...)



June 17 Küptoknü Dimapur nung Dimapur Zone Ao Officers' Telongjemi ayongzükba tetushi agütsüba sentong nung watsütemi naroküm ken tenloktsüba noksa nung angur

Iba sentong nung tongti tejaoker IGP Nagaland, Wb. Limasünep Jamir, IPS-i mulungnen o ka lemsatep dang, tanü tashi India nung 'tribal' tem rongnungbo nüborttem tenzükba mapa 'Civil Services' nung takok tulu angurtem rongnung Ao kin yaa ka lir, ibaji asen tsüraburtemi alangzüktsüba temoatsütem asütsü ta metetdaksü.

Paisa lanurtem dang," tanü asüng civil service atema tatidang agütsüba ya akhidang nungi kanga agia tasakba kümogo, anungji talisa science & technology tsütsü shisalen bushiba nung temulung

agütsütsüla," ta ajungshi.

Nüborttem tenzükba mapa ya nisung den inyaksüba mapa ka lir, anungji tangatetba aser taremzüc alitsü kanga nungdaker aser Tsüngrem mamatsüla ta paisa ayongzük. Paisa lanurtem dang kaket azüngtsü ajungshi aser taküm nung tibilemstü aser shisabolu ajuruba shiaji Tsüngremi asenok taküm tashi itdaksütsü maongka agütsür ama angateta agizüktsüla ta Limasünepisa ayongzük.

Iba sentong nung Ao Senso Telongjem Dimapur nungi tadong tir Wb.Intisangbai tepela o jembia aser Dimapur Watsü Telongjem

aser Wb.Tiameren Aier nungertemi naroküm ken tajung ka ka aten. Iba sentong nungsa DZAOT tir Wb.Imosong Imsongi tayongzükba ola agütsü aser DZAOT tongti zülur Wb.Lanzülü Aieri tepela o metetdaksü.

Iba sentong tenzükba Dimapur Ao Pastors' Fellowship nung tir, pastor Temsü Jamiri sarasadem aser takok angurtem asoshi mejeteta DABA sannüker Rev.I.Watii sarasademtsü. Iba sentong nung lenir Dr.Watila Jamir liasü aser Chumoukedima Ao Baptist Arogo nung sannükla Wt.Imotila Longkumeri sarasadema sentong atem.

NEET candidate temi online ajanga parnok tezüng züngoksemstüla

Dimapur, Aami/June 17 (TYO): Directorate of Technical Education-i sangdong ka ajanga, 2023-24 session atema MBBS, BDS & Allied courses agitsü asoshi NEET (UG) 2023 appeared candidate tem dang June 19 nü nungi tenzükba NEET (UG) 2023 menu link kübok Department indang official website www.dtenagaland.org.in ajanga tenüng züngoksemstü atema

metetdaksüogo. Online atema tenüngdakba kuli kaket ajak densema tenüng züngoksemstü asoshi tatembangbuba angoji June 15, 2023 asütsü aser iba sülen application kecha magizüktsü.

Candidate tem dang form mebenok tsüngda online application form nung tetuyuba agütsür aliba kanga junga azüngtsü atema metetdaksüogo.

Dimapur nung arr oset ayokdak 'Cane Décor' lapok



June 17, 2023 küptoknü Labour, Employment & Skill Development aser Excise Advisor Wb.Moatoshi Longkümeri Dimapur nung Cane Decor dokan lapoktsüba noksa nung angur.

Dimapur, June 17 (TYO) : Dimapur nung Notun Bosti aser Kher Mahal na tsüngda Nyamo Lotha Colony nung arr tajung agi yangluba ki oset tamentsü menden aser molokmotok tapu balala ayokba dokan ka tenüng agi 'Cane Décor' lapokogo.

Tanü Küptoknü iba dokan ya Nagaland nung Labour, Employment & Skill Development & Excise department-tem nung Advisor Wb.Moatoshi Longkümeri lapoktsü aser Borlengri Ao Baptist Arogo nung sannüker T.Apok Jamiri meshiteta sarasademtsü.

Iba dokan kibur Wb.Imkongyanger Longkumer aser kinungtsü na nem tenüngsang agüja jembidang, Naga nunger lanurtemi iba ama shishilembaba mapa peisasa tenzükba inyakba ya taküm lia aotsü lenmang shitakbaji lir, anungji tetenzük dang timtem aser takoksa ajuruaka, itemji arema maneni tajungba tajungba inyaksü temulungtetba

alitsüla aser kechisüdirsiüaka oset yanglubaji tangaria aginütsüsa tajung yanglutsüla ta Wb.Moatoshiisa metetdaksü.

Iba dokan lapoktsüsa arr agi yangluba osettem ayokba mapa ya covid wara mapang kechalenia moutet aser kecha meinyaktet aliba mapang ka nung apiteta kidang nung inyaksü tenzük ta iba dokan kibur Wb.Imkongyangeri metetdaksü.

"Kidang nungi süaka intagram aser facebook ajanga online nung India tesem balala nungi order arur, anungji ano tajungba aser tuluba küma inyaksü meranger," ta paisa ashi.

Iba dokan nung ayokba osettem karbo Kashmir nung yangluba arr osettema lir.

Iba dokan indang metetnürtemi mobile phone number 96123 92245 aser 70854 44864 nung tongtepratep sütettsü mesüra cane décor instagram aser fb nunga reprangtettsü.

Manipur nung Opposition...

(TAPAK 1 NUNGI...)

Tanü political party 10 nungi lennirtemi Prime Minister den ajuruteptsü atar saka pai ola madoker aser temepishiba kecha mesangoktsü lir. Onoki state sorkar dak tamang makar aser Centre sorkar nungiang teyari angutsü ta imlar. Home Minister Amit Shah-i Manipur semdangaka tensa kasa dang lir, ta paisa ashi.

Prime Minister Modi dang Vajpayee-i mepishiba meyipa reprangshitsü aser opposition lennirtem den ajuruteptsü akhanger. Mann ki Baat masü pai Manipur ki Baat asütsüla ta Ramesh-isa shisem.

May 3 nungi Manipur arontsü tenzükba tanü tashi aronger ta

taoba Manipur CM Okram Ibobi Singh-ia ashi.

"Ajaklen shisabulu aser nüktzü agi sünga lir. Tetsür aser tanurtem dena nisung 20,000 tashi relief camp nung jenoka lir. Ajüsüaka Prime Minister-i Manipur indang kecha mejembir. Manipur ya India nung shilem ka asü masü? Shilem ka süra kechiba India Prime Minister-i Manipur indang mejembir? Kasa tangatetba aliba political party 10-i yimjung atema memorandum ka renema lir" ta Ibobi-isa metetdaksü.

"Onok yimtenren tsütsü tajangzük atema masü saka yimjung atema arua lir. Yimlibilema onok yariang" ta paisa metetdaksü.



June 17, 2023 nü New Delhi nung External Affairs Minister S. Jaishankar den Delhi assembly nung Opposition Lenir, Ramvir Singh Bidhuri aser Delhi BJP Tir, Virendra Sachdeva nungeri 'Vikas Tirath Yatra' nung shilem agidang tangokba nung nung angur. Delhi kübok Meethapur, Badarpur, Tughlakabad, Kalkaji, Khanpur aser Chhatarpur terenlok projects balala asadangtsü atema Yatra sentong ya ayongzük.

PM Modi-i US semdangba mapang telok aikati longkak aittsü

New Delhi, June 17 (Agencies): June 21 nungi tenzüka Ato kilonser, Narendra Modi-i US semdangtsü aser US Tir, Joe Biden den senden amentsü; iba mapang nungji US nung meimchir temeden atema inyakba telok balalai India nung meimchir temeden anema inyakba tamajungba akümba anema longkak aittsü renemdar, ta osang angazüker.

June 22 nü Ato kilonser Modi-i US Tir, Joe Biden ajuruba anogo nung Indian American Muslim Council, Peace Action, Veterans for Peace aser Bethesda African Cemetery Coalition longjemer White House anasa longkak aittsü.

Meimchir temeden atema inyakba telok ana- Amnesty International aser Human

Rights Watch-ia Washington nung BBC documentary 'India: The Modi Question' sayatsü.

Tamalen India-i BBC-i adokba Modi indang documentary ya ashishia YouTube videos aser Twitter posts aika nokdanga liasü. Iba tatalokba sülen February 14 nü Income Tax Department-i anogo pezünü tashi Delhi aser Mumbai na nung BBC indang office aika mita ao.

Meimchir temeden atema inyakba telok balalai Modi-i US semdangba anema longkak aitba dak alia parnoki "Modi Not Welcome" aser "Save India from Hindu Supremacy" ozülü anünglen sayatsü sentong renemogo, ta osang angazüker.

Tir Joe Biden dangi zülüba shidi ka nung Human Rights Watch Asia Division Director,

Elaine Pearson-i White House dang Modi-i US semdangba mapang nung India nung meimchir temeden balala atema tebilemtsü akaba lemsatępang, ta mepishio.

Press Secretary Karine Jean-Pierre-i sangdong ka ajanga, "Pai semdangba ajanga asen linük anati Indo-Pacific atema inyakba lenla balala tashi itshitsü aser technology partnership tajungba akümtsü," ta metetdakja liasü.

India nung meimchir temeden atema tebilemtsü akaba dak sendakba nung tasüngdangba ka langzüdang Jean-Pierre-i, "Iba tesendaktep maneni alitsüji kanga tongtibang ta Biden-i bilemer, aser iba nungji meimchir temeden-a sendaktepa lir," ta ashi.

Odisha nung MUKTA scheme atema sen crore 225 lemozütsüogo

Bhubaneswar, June 17 (Agencies): Odisha nung 2023-24 kümsük atema MUKTA scheme kübok district ter nung aliba urban local bodies 36 atema Honibarnü Odisha Chief Minister Naveen Patnaik-i sen crore 225.53 lemozütsüogo.

MUKTA scheme kübok ayimjemba district temji Dhenkanal, Angul, Keonjhar, Sambalpur, Sundargarh, Balangir, Subarnapur, Bargarh, Jharsuguda aser Deogarh lir.

Urbal Local Bodies 36 pronglaji ward sasep nung MUKTA (Mukhya Mantri Karma Tatpara Abhiyan) kübok terenlok agütsür, aser iba scheme nung sensotem aser tongtibang stakeholders nem-a shilem agidaksür.

CMO sangdong ka ajanga, item projects ajak ya nungdakba nung ajemdaker inyaker aser environmentally sustainable projects lir, ta metetdaksü.

Action plans ji department

level nung tama asadanga sülen testüsa chief minister-i agizüker. Iba scheme kübok CM-i agizükba projects ajakji Mission Shakti groups-i mapa küma inyaktsü.

June 16 nü CMO nungi tongti ketdangsertemi district 10 kübok ULBs 36 nungi public lenirtem den senden ka mena MUKTA kübok project ajak takok ngua inyaktsü atema o lemtepa liasü.

MUKTA scheme kübok inyakba mapatemji climate change dak sendakba mapatem lir; item rongnung public kiojentem, moapu terenlok, water body development, multi-purpose community centres aser yimti tepor junga yanglushiba densema lir.

2020 kümApril ita nung Chief Minister Patnaik-i MUKTA programme ya tenzüka liasü, aser iba scheme kübok yimti nung alir sensakertem aser yimtsüngtem nung alir aayangertem nem sen aazüktsü atema maongka agütsür.



June 17, 2023 nü New Delhi nung ASSOCHAM-i ayongzükba Netaji Subhas Chandra Bose Memorial Lecture 2023 sentong nung National Security Advisor (NSA), Ajit Doval-i jembidang tangokba noksa nung angur.

Canada nung India high commission amakba NIA-i bushisüngdangtsü

New Delhi, June 17 (Agencies): Canada aser US na nung Khalistani züngsemtemi Indian High Commission amakba tatalokbatem National Investigation Agency (NIA)-i bushisüngdangtsü, ta Honibarnü Delhi Police-i metetdaksü.

Taküm March ita nung Canada aser San Francisco (US) na nung Indian High Commission amakba sülen Delhi Police Special Cell-i Unlawful Activities (Prevention) Act (UAPA) ozüing kübok FIRs benoka liasü, aser iba ken oji NIA nem

bendanga agütsüogo.

Tawa US nung Khalistan pusemertemi Indian Embassy aser Indian Ambassador to US, Taranjit Singh Sandhu amokmerena liasü.

Indian High Commission kima longkak aitba sentong nung lokti den jembidang longkak aiter Ambassador, Singh amokmerena, pai-a 1994 küm taoba mapang India Tir, Zail Singh dak atalokba kasa tia ajurutsü, ta odiodia amokmerena liasü.

Iba dak sendakba nung US-i, US nung aliba bendangertem kiojen amokmerenba mesüra

nisung amokmerenba ya tebilemtsü tuluka lir aser itemji onoki khenyongi magizükttetsü," ta metetdaksü.

Khalistan pusemertemi Indian Embassy aser San Francisco Consulate nung aiben longkak aitba sentong ayongzükba agiogo. March 20 nüa San Francisco nung aliba Indian Consulate amak.

Taküm March ita nung Khalistan pusemertemi Canada nung Indian Embassy kima longkak aita Khalistan pusemba yimyim ayim aser India nunger osangbenertem dak teka sangshia liasü.

Amit Shah-i Gujarat nung yipru agi kongshiba tesemtem semdang

New Delhi, June 17 (Agencies): Cyclone Biparjoy agi Gujarat state kongshiba sülen Honibarnü Union Home Minister, Amit Shah-i Gujarat kübok Bhuj semdanga tensa asadangogo.

Union home minister den Gujarat Chief Minister Bhupendra Patel nati tayimtsü nungi cyclone agi kongshiba tesemtem repranga asadang.

Nikongdang Amit Shah-i Bhuj nung tongti ketdangsertem den senden ka amen.

Hokolbarnü Cyclone Biparjoy tashi meiti akümba sülen south Rajasthan tsütsüleni ogo. Iba yipru ajanga Gujarat kübok Kutch aser Saurashtra regions nung kiojen aika raksatsüba den light indong aser süngdong aika laodaksü.

Ketdangertemi jelia yipru agi kongshitsü aliba tesemtem nung alirtem nisung lakh 1 dak tema aienshidaktsür aliba ajanga iba lendong nung shinga masü.

Chief Minister, Bhupendra Patel-i sangdong ka ajanga, "Jelia asalentong yanglur nisung lakh 1 dak tema aienshidaktsüba ajanga state nung nisung asüamaba maliasü," ta metetdaksü. Tang tashi yimtsüng 1000

jungnüa nung light mali. Kutch, Devbhumi Dwarka, Jamnagar, Morbi, Junagadh, Gir Somnath, Rajkot aser Porbandar district tem nung team 1,127-i light yanglushidar, aser forest department teams-i gari lenmang nung laoba süngdong 581 aienshiogo, ta ketdangsertemi metetdaksü.

Iba yipru ajanga state power utility Paschim Gujarat Vij Company Limited takoksa kanga nguogo, kechiyong light indong 5,120 tashi raksa, ta Relief Commissioner-i metetdaksü.

Gujarat kübok tzüyimkümlen aliba district tem nungi nisung 1,09,000 tashi aienshidakja temporary shelters-i anir oa jenokdakja liasü. Parnok rongnung tanur 10,918, teintet senso 5,070 aser mashisa tetsür 1,152 liasü; iba lendong mapang nung mashisa alirtem 1,152 nungjagi parnok 707-i tanur 707 aso, ta sorkari metetdaksü.

Brihostibar nikongdang 6:30 ako meta iba cyclone, Saurashtra-Kutch tzüyimkümlen tonga aru, aser iba mapang nungji tzünglu sashia aruba den külemi mopung ghonda ka nung kilometer 140 tashi kera aon.



International Day of Yoga atongtsü anogo ishika dang lia June 17, 2023 nü China yimtiba, Beijing nung Indian Embassy-i ayongzükba Yoga sentong nung India nungertemi shilem agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, AAMI (JUNE) 18, 2023

Ni tebu ka lir

Tanü ya alima ajunga nung tebutem anogo lir. Atangji, tebutem anogo amongba ya pei chirnur alirtem asoshi dang masü saka tebur tain shirnok temeim, teyari aser aküm kübok tanurtem teyari aser tejenokdak angor, parnok ajak asoshi tebu temeim anogo ya amonger. Tanü alima asoshi tenüngdaktibaji Tsüngremi nungloksüba mapa meteta kibong anepaluba tebu tajung nüngdaker. Tebu masüyonga tebur ka asoshi alima nung khuret abentsü aika lir, kechiyong paji tetsür dang nungi tama yanglu aser tetsürtem dang nungi khuret aser maongka tuluba agüja lir. Aji oda, kodang tebur ka tebu kümdir, idangyongjisa pa khuret aser maongkajia ulushir. Asenoki Tsüngrem dang oba ta ajar, anungji alima nung obalatemji Tsüngrem mesüka alitsübaji kanga nüngdaker. Tsüngremer oshi, lbri oshi nung 'oba' dang 'abba' ta ajar. Abba tetezüji lbri oshi nung ajak angu tenzükdak (source) lir. Ajak angudak tetezü tejenokdak, anisüngzükdak aser taküm nüngdak ajak dena lir. Iba jagiang, Mathi 6:33 nung asenoki obala yimli nung pa temeshibai mulungba ama lira, asenok kecha shisabolutsü mali, kechiyong asen nüngdak ajak asenok nem pai bendenloksütsü ta shia angutsü. Iba jagi kodang asenoki bilemdangdir, alima nung tebutem asoshi maongka dang nungibo khuretang tuluba amai asenoki angatetsü. South Korea nungi tenzüka Fathers' School nung adener tebutem ajak nem pei nem agütsüba temoatsü, maongka, aküm aser khuret nenshia angatetdaksütsü asoshi tamasa "Ni tebu ka lir" ta ayimdaksür. Aji oda, kodang tebur kati ni tebu ka lir ta ayimdir, meteta aser memetetiaka alima nungbo 'nia tsüngrem ka lir,' ta ayimba den kasa lir. Asenoki Tsüngrem dang oba ta ajar asünungji, alima nung oba ta ajartem jagi obalatemji Tsüngrem amai bilemer, anungji Tsüngremji tereprangtsü nunga alima nung pei tebu mesüka alitsü amai oba ta ajartem jagi nükla nung angor. Iba khuretji meteta tebu aikati kidang kibong nung dang masü saka lokti, arogo aser yimten ajak nung nüngdak agütsür obala ka ama alitsü meranger. Alima nung alirtem asoshi takar aser tular tema parnok yari aser tilar aser sensakertema pei yari "ni tebu ka lir" ta angatetter asoshibo shisabolu khuretji lir. Ajisüaka, aiben tebu kati kidang kinungtsü aser tanurtem dang shisaboluji mesayur. Alima tebu kati par kibong, par lokti, yimten aser arogo nüngdakji mashiyonga reprangteta dang lir aser itemji kotaker tebu Tsüngrem den tesendaktep alinung dang angutsü ta pai meteta lir. Ibayongji, kibong nung tebu sannükba mapa inyaker. Kibong nungbo tebu kaji pastor aser putir lir. Pa teka agi nemeta sarasademtsüba kinungtsü aser chirnurtemji azükarutsü. Iba kasaji lokti aser yimten nung tebu kaji yimsüsür aser nokinketer ka dang masü saka sannüker aser putir amato tanüla khuret abentsü kanga nüngdaker. Kodang, alima nung tebu kati tebu Tsüngrem memesüki lidir, tanurtemi kotak limaji kecha nükshia mebilemstü aser Tsüngrem dang oba ta jaa sarasadema mesünütsü. Ashiko, tanü tebutem aika pei khuret aser maoangka memeteti pei tanurtem aser kinungtsü yutsür seplepa jajaya alitsüa akok. Kidang tebu masü saka tetsü kibong nüngdak asoshi senotsü bener arua alitsüa akok, ajisüaka iba jagi tebu ka khuret aser maongka mali mekümdaksür. Tsüngrem mesüka tebutem yanglu süra tebutemjia Tsüngrem mesüka alitsü asoshi tanü ama tebutem anogo amongba mapang ya tebu shiai temulungjang nung telemtetba agitsüla.

OLEMSABANG

TEBU KAJI TSÜNGREM TEMOATSÜ

~ M.A.Naga, 4th mile C, Khel.

Oba tanü iba anogo tulu nung na taküm ali ama onoki akhüm tetushi tulu agutsür, na taküm alidang ne temeimji kecha den metemdangtsü makokba liasü, nai temolongjang agi dang masü shi, azü, aser taküm ajongai onok meima aru, nepener kipong suaka patong/jala tsüngda nung nai shinga bendanga mamshi, kodang kibong nung timtem toushi, shirangshiko balala agi tongdir nai ola madoki anunglen repranger kijiba phaaang ta shipanger takdangi ir Yihova Tsüngrem dang sarasademtsüba to yimdangi arudang temulong kanga amsar aser ajeper. Kibong nung na tasü tait obala liasü, nai anü tatsük, yipru mopong metsübu, kechiaser chirnur timtem nai mereprangtet, naji chuba ka dang nungia taoba liasü, iba akümüli nung kipong ajonga machi-majemi nai timtema meyutsüi anir aru, na taküm alidang iba akümüli tongpang tesashi nai onok asoshi kokogo. Tasübaji shingai metongdangtetsü kechiaser lipok nungi meimchir arishiji Tsüngremi Routine yanglur yuadokogo, anungji künü onok ajak na alidakji sendentsü anungji iba asoshi nai nemjema tepilem. Kibubai na arishi küm 90 tashi temang anema dang lia anir ogo. Tanü na meliaka iba anogo tulu nung na ali ama akhüm tetoshi agütsür, Tsüngremi taküm alir teputem ajak moajang.

ALUYIMER TEBU

~ Temjentenzük Changkiri

Kübu ochishir aluyimer ka liasü.
Alu wadang nung noktak dang-
Pa tekojong aser terongdongi,
Tesashi anü tatsük tizük;
Pa temopui,
Atang temesü, lenku aika ajanga jaja!

Asentzü agi temang chigur;
Sünglang nung anisüngzüka mener;
Mopung tanep agia alidang;
Onoki tzümülu temokong agütsüba;
Tanübo kanga menungrar!

Joko nia tambur ka-
Tanurtemi,
"Happy Father's Day, Abao",
Ta salem asüandang,
Kü mulung nung tasüngdangba kati, Metangtangi jembidaksür-
Ni ochishia alu inyakdar ma?

NISUNGER SHISATSÜ TANGATETBA ASER JAKLA-YIMYA TAPU BALALA

~ L. Kika Pongener.

Alima ajunga sunga sobaliba-a aliba nisungtem ya jungjunga bushidanga ora, nisung shia shisatsü tangatetba aser jakla yimya tapu telemsa aikasa angutsü. Asen Naga nunger kintem rongnunga, kin shia nisung shia jungjunga bushidanga ora, telemsa tapu aikasa angutsü. Atangji, Tsüngremi yangluba nisung rongnung shisatsü, tangatetba, yimyatsüya, jembishinu, jaklaliro aser loktiliba nung wainshin, tangar den koda sobaliba-a sentaktepa alir, item ajakji kanga junga asadanga bushidanga ora telemsa aika angutsü. Alima ajunga nung yimsusurtem tangatetba shisatsü aser jakla yimya asadanga bushidanga ora, lennir shia tangatetba shisatsü aser jakla yimya balala angutsü. Asen Naga lima sorkar yimsusua aruba asadanga bushidanga, State ngur lennir balala melentepa yimsusua arudang, lennir shiba yimsusuba mapang, linuk terenlok mapa tajungba/tuluba inyak (?) Shiba yimsusuba mapang nuburtem yimchi-yimjung nung yimsusua aru (?) Shiba yimsusuba mapang sorkar rongsen ochishia ketdangsua amshi (?) Shiba yimsusuba mapang nuburtem taginuba shitak tonga inyak (?) Shiba yimsusuba mapang ozü kinunger, ozü yimer, ozü tzükong, ozü kin...ta apia terenlok mapa inyak (?) Teyari agütsü (?) Aser sorkar mapa nunga aniok (?) Item ajakji asadanga bushidanga ora, ashiko yimsusur kar lennirshiba mapang nungbo pei nisung, pei yimer, pei tzükong, pei kin, pei District atsünga terenlok mapa inyakba, Sanction agütsüba aser sorkar mapa nunga anioka alitsü akok. Aji oda, India lima nunga yimsusur balala melentepa yimsusua arudang, shiba yimsusuba mapang asen Naga nunger dang meima benshi, terenlok mapa asoshi senotsü aika agütsü, shir yimsusuba mapang tamangba yimsu nunga mekongshi, kin tulu-tila ajak kasa ketasena benshia yimsu asü... ta bushidanga yimsusur kar mapangbo nuburtem kanga timtemdaksüba angutsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Dimapur nung 33buba YMCA-NEIR Regional Council senden agi



Dimapur, Aami/June 17 (TYO): Livingstone Foundation International, Dimapur nung June 15 nungi June 17 tashi Young Men's Christian Association (YMCA), North East India Region 33buba Annual Regional Council Meet ayongzuka agiogo; iba senden ya 'Leadership and Responsibility' omen nung ajemdaker agi, ta Honibarnü YMCA Dimapur, Nagaland Media & Information Team-i sangdong ka ajanga metetdaksü.

Iba sentong nung tetushi tejaokerji General Secretary, Aizawl YMCA aser Chairman, Regional Millenium Building Project, NEIR, Er. K. Lalsawmvela liasü aser alakteta tejaokerji YMCA Advisor aser Nagaland Post yimobilem zülur, Geoffrey Yaden liasü.

Chairman, Regional Committee, YMCA-NEIR aser Mizoram nung Health & Family, Higher & Technical Education & Industries & Commerce Minister, Dr. R. Lalthangliana Thangtea iba sentong nung medentetyonga pai salem osang lemsatepa liasü.

Iba sentong ya YMCA Nagaland Tir aser YMCA North East India Regional

Committee nunga tatong Tir, Dr. Andrew Ahoto Sema leniba nung YMCA Nagaland-i ayongzuka liasü.

Kasa sentong nung Aizawl, Shillong, Dimapur, Nongtalang aser Shangpung nungi YMCA lanurtem aden. Lanurtemi leadership training agia liasü.

Shisalen sayurtemji A. L. Pariat, Regional Treasurer, NEIR, Ysm. Roshan J. Chirayath, Regional Director, Central India Regional Y's Men International, Ysm. Wu Haan Choo David, Regional Director, North East, North East India Region, Y's Men International, Joe RZ Thanga, Jt. Secretary, Aizawl YMCA, Regional Committee Member & National Board Member, National Council of YMCAs of India aser Livingstone Foundation International Director, Wt. Ani Yephthomi nung liasü.

Anogo asemnü sentong nung adenertem rongnung F. Rymbui, President, YMCA Nongtalang & Regional Committee Member, Shamir J. Thabah, Regional Secretary, NEIR, Kr. Palvidora Kharkongor, Chairperson, Women Forum, Regional Committee Member aser Board Member, Jowai City YMCA, Rev. C. Khonglah

nunger liasü.

June 15 nü tetenzük sentong nung okila jembidang tetushi tejaoker, Er. K. Lalsawmvela-i Khristan lenisüba nung ajemdaker 'lenisüba aser khuret' indang lemsatep.

Dr. Andrew Ahoto Sema-i lokti pelaa agizükba o jembi aser YMCA Advisor Geoffrey Yaden-i YMCA Nagaland tejakleni oa renlokba indang tongmelang agi metetdaksa liasü.

Kasa sentong nung Joe RZ Thanga-i tayongzükba o jembi, LFI Chaplain Kr. Zhimoholi S. Zhimomi-i sentong tenzuka sarasadem, LFI nung Worship Leader Gideon Sangma-i ken ka aten aser Shamir J. Thabah-i tepela anküp o jembia liasü.

Anogo asemnü sentong nungsa onük balala nung training agi; onüktemji 'Peace from Brokenness', 'Leadership and YMCA' aser 'YMCA & Y's Men relation in community building' liasü.

Kasa sentong nung Regional Director, Central India Region, Y's Men International-i Dr. Andrew Ahoto Sema District Governor of District-3 (North East India Region) shim aser Sanjeev Momin District Secretary shima liasü.

ANOGO ABEN TSÜNGREM DEN

NA INANG

"Saka asen Kibuba aser temetetba nung inang." - 2 Peter 3:18

Tanur kati pa tain akümdang tashi tait teintet taküm ka kümner. Aluyimer aser naro metsürtemi pei atemba aonsotsü aser naro ainba angudang pelar aser jangra atemer.

Arogo nung tenzükertemi nütsüng yongsük ainba den nübur tanela nung ainba angudang mejembitetba tepela agi asünger. Mission mapa nung tanelatem aika anir aruba den arogotem renloka aodang Tsüngrem tenüng sanga pai asen mapa nung süngjang tangtsüba angur.


Tamanger ka ama Laishibai asenok kechisarena nung sütepa aintsü sayur. Tsüngrem O nung tera yanga metenloktepa yanglua aintsüla (Kol 2:6-7). Süngdong ka ama asen takümji tema lira ayongküm nung atemba süngdong mesüka aintsü. Aintsü atema asenok Khrista dak alitsüla (Yoh 15:4,5) aser Pa O benshia tera ayangtsüla.

Ainba melira rajang, ainba melira tasü, ainba melira shizüka aotsü tetenzüker, anungji ibaji meteta mapang ajak nung süngdongi kechi nüngdaker angateta anepalua indaktsüdi.

Tsüngrem O nung inti, Pa taochi nung inti, temeim nung inti, agütsüba nung, lemsaba nung, telungjem nung anogoshi Yisu mesüka inti.

Ne dak anogoshia aintsü tashi kü nem agüjang. Amen

'The Blind' film taküm September 28 nü sayatsü



June 17, 2023: Khristan film 'The Blind' taküm September 28 nü theatres nung sayatsü aser iba film ajanga Tsüngrem tashi jungkakai adoktsütsü, ta osang ka ajanga metetdaksü.

Iba film ya Phil Robertson chichiba taküm otsü nung ajemdaker yanglu.

Iba film otsü ya Phil aser Kay Robertson na meimtepa kibong akümba, Phil-i yi indoktsü merangba, kibong nung timtem adokba aser tesüsa pai Yisu Khrista agizükba chichiba otsü nung ajemdaker yangluba film lir.

Film nung tongti shilem agirtemji- Aron Von Andrian

(Phil Robertson shilem agisang) aser Amelia Eve (Kay Robertson) na lir.

Kasa film nung Matthew Erick White, Kerry Knuppe, Whitney Goin aser Virginia Tucker nungeria tongtibang shilem agia lir.

Tena jabaso, Jase Robertson arrshi küm 7 asüba mapang nung tebu taküm kanga junga melenshir.

Osangbener den jembidang Phil-i, "Item tatalokbatemji ni mebilemtetner, ajisiüaka parnoki iba film kanga junga yangluogo," ta metetdaksü.

"Mapang tamajungtem ajurua liasü, ajisiüaka iba ya Tsüngrem tashi indang taküm kuli lir," ta pai ashi.

Par jabaso Jase Robertson-i, tebu taküm kuli ajanga pa taküm nunga kanga kongshir, ta ashi.

Jase-i, "Ni Khrista nem kü taküm bendanga agütsüba tongti kuliji ibai lir. Nisung kanga tamajunger ka (tebu) nisung tajungtiba akümba ni angu. Ni iba atemaji süngmanger. Iba lenmangji ajanga ni-a kasa lenmangi anir," ta ashi.

Peter Machado-i Manipur nung Khristantem atema tebilemtsü katsür

Bengaluru, June 17 teimla akar aser sarasademtsür," (Agencies): Bangalore nung ta pai metetdaksü.

"Tamangba yimsü temeden agütsütsü atema sorkari inyaktsüla, talisa nüburtemi tashi agütsüba party-i iba atemaji inyaktsüla," ta pai ashi.

May ita nung Manipur nung rara tulu adokba sülen tensa süngjemer lia ano asentenshir Bodhbarnü (June 14) rara adoka tensa raksaogo.

Meitei kini "Scheduled Tribe" jenjang akhangba anema Kuki aser tangartemi May ita tetenzüklen longkak aitba mapang rara adoka liasü.

Tawa Bengaluru nung Manipur nungi kaketshirtem telok ka den jembidang Peter Machado-i,

Arogoi ketdangsuba shisaliok rejutem nung kaketshirtem angati züngdaksütsü aser Manipur nung rara agi kongshirtem taküm asentenshir yangershiba nung Arogoi akokba tashi yaritsü melunga lir, ta lemsatepa liasü.

Iba dak alia Tenla ki aika rongdoktsüogo aser Jesuit putirtem amokmerenba osangtem lir, ta pai metetdaksü. "Iba ya ajanga yimsü nung ajemdaker amokmerenba agi nüburtem lendong nung aliba tia sayur. Iba tensa ya azioktettsü aser Manipur nung nüburtem atema yimjung arutsü, ta onoki

**AO OSHI ANGAZÜKDAK:
TANÜ ANGAZÜKTSÜBA OJANG**



Rarem

(v) shiranga yaretba, temang tashi mait aküm (sickly)

* Par jala kabo tasodang nungi **rarema** dang alir.

Raren

(adj) temoatsüren (way of prosper)

* Ozü kibong Tsüngremer **raren** nung pelatepa alir.

OLONG PAITEP # 6548

15x15 crossword grid with numbers 1-19 indicating starting positions for words.

TIPILEN

- 2. Teburtemi tejak nung awaba - (8)
- 6. T ___ _ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6548 TELANGZÜBA

TIPILEN :

- 1. Chikok, 5. Injung, 6. Keyi, 7. Ajob, 12. Artsü, 13. Kilen, 14. Tasa, 17. Atep, 18. Anatsü, 19. Moatsü.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.



ALOKBA O DOCTORBA NA MANGATETEP INYAKER :



Alokba : Sir, nai zülutsüba to bener pharmacy 50 shi semdangogo, shinga ket nunga iba mozü ya maliasüa tu, ya kechi mozü zülutsüba?
Doctor : Kwa Kwa ni kechi zülutsübar.....Haet yabo ni pen nungi ink junga alur-malur tendangba dangato, kechiba memeteti nemzüli aoba?
Alokba : Oh Sorry.

- Lilir : WhatsApp

Lakhimpur nung tzümetsüng tensa tamajungba akümer



North Lakhimpur, June 17, 2023 (Agencies): Tesüiba anogo pezü tashi tzünglu aruba agi Assam kübok Lakhimpur district nung tzümetsüng timtem tamajungba kümogo.

Lakhimpur district kübok Revenue Circles pezü nung yimtsüng 22 nungi nisung 23516 tzümetsüng agi kongshia lir ta District Daily Flood Report ajanga metetdaksü.

Lakhimpur district nung tzümetsüng agi kanga mejungi kongshibaji Nowboicha Revenue Circle lir, Iba tesem nung nisung 22,466 timtemer.

Solmorja nung River Singra nung tzü mesemi ayimba agi ayongrü melenshia ayimer. Iba ajanga tesem aika tzü agi mobangogo.

District water resource department-i ayongrü akhi lenmangi melentsü meranger.

Ano, Gerukamukh nung National Hydroelectrical Power Corporation (NHPC) indang Subansiri Lower Hydro Electrical Power teküpoklen alirtem tsübuteper, kechiyong Ghansarai ayong nung tzü danger level tema ayimer.

Subansiri nung tzü talila akümba ajanga powerhouse

longbanga yangluba temporary dyke raksatsüogo.

Kasa mapang, NEEPCO indang Ranganadi dam nungi tzü chioikba ajanga Lakhimpur nung tzümetsüng timtem tuluba ajurua lir.

Arunachal Pradesh kübok Yazali nung aliba NEEPCO ketdangsürtemi North Lakhimpur nung district ketdangsürtem dang tzü chioikba osang sangoktsüogo.

Iba ajanga North Lakhimpur nung Ranaganadi ayong nung tzü talila kümogo aser tzüküm anatsülen alirtem asoshi lendong bentsür arutsü ama lir.

Khamenlok nung lendong atalokba atema FIR ka benok

Imphal, June 17, 2023 (Agencies): Khamenlok lendong nung mejangjaba nisung kari injang khaloktsüdang nisung 9 asü aser iba dak sendakba nung tanü Imphal police station nung FIR ka benokogo.

Iba lendong ya June 12 aonung 6:30 ako nung atalok.

Second-In-Commmand, Camp Comdt. HQ IGAR (S) VP Srivastav-i FIR nung Indigenous People's Front, Manipur indang Advisor Jagat Thoundam dak tai tonglokja lir.

Jagat Thoundam-i telok balala tsüngda tsükchitep adokdaksür ta paisa tai tongloktsü.

Iba lendong atema SI Farooque Sheikh nem bushisüngdang asütsü mapa lezmüktsüogo.

June 12 nü mejangjatetba nisung kari Khamenlok yimtsüng nung ki aika rongdoktsü aser Gobajang, Tamenglong district nung nisung aika yirutsü.

East Khasi Hills anentsüh nung tanur 4 asü

Shillong, June 17, 2023 (Agencies): East Khasi Hills kübok Laitlarem yimtsüng nung aentsüh lendong tulu ka atalokdang tanur pezü asü.

Iba lendong nung nisung ana kanga mejungi yirua lir ta osang angazüker.

Iba lendong atema state sorkari tasür kibong shia nem Rs 4 lakh agütsütsü metetdaksüogo.

Tzünglu kanga aruba agi West Jaintia Hills district kübok Darrang yimtsüng nung anentsüh aika alu.

Chief Minister Conrad Sangma-ia tensa osang metetpelatsü atema senden ka ayonga menogo.

Tanep National High 06 nung Sunapur Tunnel nunga anentsüh aluba ajanga traffic mesenzüteti aküm.

Anentsüh ajanga lenmang noktanga ajanga garitem tanga lenmangtem ajanga senzütsü metetdaksüogo.

Brihostibarnü National Highway 06 nungsa Sunapur nung anentsüh aluba ajanga traffic nung timtem ajurua liasü.

Sunapur Tunnel anasa tesem nung mapang shia anentsüh alur aser iba ya Lukha River adenli lir.

North Sikkim nung Indian Army-i tourist 3500 kümzük



Gangtok, June 17, 2023 (Agencies): June 16, 2023 nü Sikkim nung tzünglu kanga aruba ajanga anentsüh lendong ajuruba den Chungthang anasa tzü agi apu ka ponger aoba ajanga tourists 3500 shi len tom nung anendaka liasü.

Iba osang angashia Trishakti Corps, Indian Army aser Border Roads Organisation sepaitemi tzünglu aruaka tourists kümzüksü atema mapa inyak. Sepaitemi tourist tem ayong

ajangdanga anir ao aser chiyungtsü den medical teyari agütsü.

June 17, 2023 nikongdang 3:00 ako tashi nung tourist 2000 tema kümzükogo aser road connectivity atema mapa inyakdar. Sepaitemisa tanüngba tourist tem kümzüksü atema mapa inyakdar aser süki yangluba den medical aid posts lapokogo.

Külen, State sorkari tetuyuba agütsüba ama District Administration-ia June 16, 2023 nikongdang nungi mapa inyaksü

tenzüko. QRT (DDMA), Sikkim Police, GREF, BRO, ITBP, Army, Travel Agency Association Sikkim nübotemi tourist tem yarir.

District Administration-i bus gari 19 aser gari tila 70 renemogo aser iba osang zülü tashi nung bus gari asem aser gari tila ana nung passengers/ tourists 123 anir Gangtok-i apusoa ogo.

Ano, anentsüh alua aliba tesem nung public aser Panchayat temi süng agi apu ana yangludat.

DRC arrtsü anasa telungpurtemi Uganda nung school ka amak



School amakba sülen tangokba noksa nung angur.

Kampala, Aami/June 17 (Agencies): Telungpur asütsü ta temulung melemi bilemertemi Democratic Republic of the Congo den arrtsü anasa school ka maka nisung 41 tepsetogo, aser nisung kwi pur ao aji tang tashi mejangjai lir, ta jila mayor aser local media sangdong balala ajanga metetdaksü.

Asürtem rongnung kaketshirtem, tanüker ka aser iba jila nung alir nisung ana densema lir, ta Mpondwe-Lhubiriha Mayor Selevest Mapoze-i Honibarnü Associated Press dang ashi.

Mapoze-i ashiba agi, telungpurtemi dormitory ka nung mi senoktsüba sülen kaketshirtem aika rongset aser tangrtem ya nok aser prangbong amshia tepseta liasü.

Allied Democratic Forces (ADF)-i Hokolbarnü menor Mpondwe nung Lhubiriha Secondary School maka dormitory ka rongtoktsü aser chiyongtsü ayuar oa liasü, ta police-i Honibarnü metetdaksür liasü. Allied Democratic Forces ya DRC anütoklen amendaker aliba Uganda nung telungpur teloka ka lir, parnok ya ISIL (ISIS) telok den sendaktepa lir.

Lhubiriha school, koba nija meyong school ka lir, iba school ya Uganda kübok Kasese district nung amendaka lir. Iba district ya DRC arrtsü nungi km ana shi pilar lir.

"Tang tashi nung school nungi tasümayang 25 nguteta Bwera mozüki-i yokogo. Maneni ano nisung ti tashi kanga mejungi yirur lia ngutetogo aser Bwera mozükisa yokogo," ta Uganda police-i mezüngbo Twitter ajanga

metetdaksü.

Uganda indang defence otongdar Felix Kulayigye-i Honibarnü ashiba agi, telungpurtemi pur aoertem kümzüksü atema sepaitemi iba school amakertem bushia odar.

Local Daily Monitor osang kaket sangdong ka ajanga ashiba agi, iba school amakertemi parnok jena mao tsüngda nisung aika pua liasü. Police-isa, parnoki school amakertem arishidar, shirnok DRC nung Virunga National Park leni jenaogo, ta ashi.

Kasese nung Uganda tir Yoweri Museveni tenüng nung nokdakba ketdangsür Joe Walusimbi-i Associated Press dang phone ajanga ashiba agi, telungpurtemi nisung kwi pua bener ao iba indang jangjatsü atema ketdangsürtemi inyaktepdar.

"Tang tashi nung asürtem ya ajak iba school nung kaketshirtem ta jangjaogo," ta pai ashi. "Tasümayang karbo majitetsüsa rongogo," ta paisa shisem.

Opposition lenir aser iba tesem nung nungtugu yimden yimsüsür Winnie Kiiza-i Twitter ajanga iba tasümay inyakyim ya aitsüogo.

Lai ashiba agi, "school amakba ya agizüksü makok aser iba ya tanurtem temeden anema inyaksangshiba maparen ka lir." Laisa school ya kaketshir ajak atema tekümzüksü tesem ka asütsü nungdaker, ta ashi.

Küm shika tsüngda civilian tem aiben amakba atema ADF aija arudar. April ita iba telok yagi DRC anütoklen kinük nung aliba tesem ka maka nisung 20 tashi tepsetba atema aitsüogo.

Uganda nung ketdangsürtemi joko küm aika kidang aser bendanglen oa ADF züngsemtem bushia aputsü tenanzükba agüja arudar.

March ita DRC anütoklen Mukondi yimtsüng maka nisung 36 tepsetba ya iba telok yagi asütsü ta temulung melemi bilemer.

Uganda nung ketdangsürtemisa 2021 küm linük yimtiba Kampala amakba atema iba telok aitsüogo aser parnoki DRC den longjemer tayimtsü amshia iba telok maka liasü.

ADF, koba United States-ibo kiralongrar telok ka ama züngshir, parnok ya DRC nung aliba telungpurtem ajak rongnung tesashitiba ta züngshir.

ADF ya 1995 küm Museveni administration den raratsü atema Uganda Muslim Liberation Army aser National Army for the Liberation of Uganda (NALU) na longjemer tenteta liasü.

Kümtem tsüngda iba telok nem DRC sorkar balalai teyari agütsü, shirnoki linük nung Rwanda aser Uganda na inyakyim temseptsünüa liasü.

Ajisüaka 2013 küm ADF-i Congolese military target tem amak tenük aser ibayongji army-i meyiper raratsüsa aküm. Iba sülen 2015 küm lenir Jamil Mululu Tanzania-i jena ao, kong pa apu aser kiralongraba dak sendakba nung obendangsü atema linüki meyipa anir aru.

Tawa ADF pur ya ISIL den sendaktepa inyaka arudar aser parnok dang Tauheed Wau Mujahideen nung Madina ta ja arudar.

KIBUBA KIDANGI OR KÜM ANA AJUNGBA ANOGO

Asür Mrs. L.Atula Jamir



(18-06-21 to 18-06-23)

Oja, na Kibuba kidangi or tanü küm ana ajungba anogo onoki menungra bilemteter, nü tamang sarasadem aser sayubentsü o tajungtem bilemtetdang, onok temoatsü kanga angur. Nü shisa taka aser mapa tajungtem agi onok teti len anir.

~ Temeim Kinungbo, Chirnur, Semchir aser Kinungertem.

Shehbaz-i party tekolakba Nawaz dang Pakistan-i meyipa arutsü mepeshi

Islamabad, Aami/June 17 (Agencies): Pakistan Ato Kilonser Shehbaz Sharif-i Hokolbarnü Pakistan Muslim League-Nawaz (PML-N) tekolakba Nawaz Sharif dang kidangi meyipa arutsü aser linük nung pa lenisüba nung election atema nübuyimba sentong agitsü aser PM akümtsü asoshi mepeshia metetdaksüogo, ta Geo News sangdong ka ajanga metetdaksü.

Party general council senden nung o jembiba mapang PML-N, Sharif-i ashiba agi, pa pa teti tambusang Pakistan-i meyipa aru atadar aser iba sülen party senden amentsü, ajita asünungdang pai PML-N indang tir mapa pa nem tanaben meyipa agütsütetsü.

Temetetsükaji Nawaz Sharif ya temang nung timtem aliba ajanga 2019 küm November ita nungi London nung oa lidar.

"Election commission indang nok sangzudar aser ibayongji senden ayongzüka amen," ta Ato Kilonser-i shisem.

Supreme Court-i party office mapa mabentsü asoshi Nawaz nem tenokdangba agütsüba sülen Shehbaz nem PML-N tir mapa agütsü, ta Geo News-i ashi.

Paisa, PML-N-i lanur lenirtem nungdaker ta shia

Maryam-i kanga meranga inyakba atema la nem tenüngsang agütsü.

"Nawaz Sharif Pakistan-i meyipa aruba sülen yimden yimsüsüba mapa melenshiba nenoki angutsü," ta PM Shehbaz-i ashi.

Pakistan tir Arif Alvi-i, Supreme Court Review of Judgements and Orders Act 2023 nung sign süa Nawaz Sharif taküm tepeyong tenokdangba agütsür aliba anogo 60 tsüngda mepeshitsü asoshi temeden agütsüba sülen hopta ishika lir iba olen lemsatepogo.

Ozüng tasenba kübok Article 184(3) dak sendakba nung ken o tem okadak telemtetba agiba anema temepeshiba benoktetsü.

Pakistan Supreme Court-i Panama Paper ken o dak sendakba nung 2017 küm July 28 nü Nawaz Sharif disqualify sütsü.

SC-i pa taküm tepeyong public office kecha mabentsü atema tenokdangba agüja liasü. Iba sülen küm ka lir Elections Act 2017 anema benokba ken o sangdongba mapang Articles 62 aser 63 kübok disqualify sütsüba nisung kati political party ka tekolak mapa mebenetetsü ta SC-i sangdonga liasü.



Moscow: Russia tir Vladimir Putin-i Hokolbarnü ashiba agi, Moscow-i nuclear hadir mezüngbuba batch Belarus-i yokogo. St. Petersburg International Economic Forum nung o jembiba mapang Putin-i ashiba agi, nuclear hadir tanungba ya lemluwa tembangba sülen yoktsü

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

Dated, Kohima, the 16th June, 2023.

NOTIFICATION

NO. DTE/ ESTT-2/NEET/01/2021-22/ This is to inform NEET (UG) 2023 appeared candidates to register online for undergoing MBBS, BDS & Allied courses during the session 2023-24 from the official website of the Department www.dtenagaland.org.in under NEET(UG) 2023 menu link w.e.f. 19th June 2023.

The last date for the online submission form with all necessary documents is 15th July 2023, after which no applications will be entertained.

NOTE: Candidates are informed to read all necessary instructions given in the online application form carefully before the form is submitted.

(Er. VIPULHOU LHOUNGU)
Director.

Satwiksairaj aser Chirag na Indonesia Open final-i iogo



Satwiksairaj Rankireddy & Chirag Shetty

Aami/June 17, 2023 (Agencies): India nung rongnung tebur tarep asaya nung temaba jenjang nung aliba tarep Satwiksairaj Rankireddy aser Chirag Shetty nati Honibarnü tebur tarep asaya semi-final nung Korea nung tarep M.H Kang aser S. J. Seo na koka final-i iogo. India nung tarep atema iba asaya akokba ya otsüsüsüka liasü, kechiyong Satwik-Chirag na tang mezüngbuba BWF World Tour Super 1000 final-i iogo.

Semifinal asaya nung tenati

Korea nung tarep ya 18-21, 21-19, 21-18 agi koka liasü.

Tarep ana tsüingda asaya minute 67 asaya aser talisa tasembuba set kanga toktepa jangradema asayaogo. Tasembuba set nung team ana ya mapang ka nungbo 16-16 ta point kasasa liasü. Iba sülen Satwiksairaj Rankireddy aser Chirag Shetty nati point pezü atonga ngua 20-16 aküm aser asaya akok.

Satwik aser Chirag nati Korea nung tarep ya taoba mapang anaben koker liasü aser

Honibarnü takok anguba sülen tenati 3benbuba kokogo. Korea nung tarep yagi tena khen koka lir.

India nung tarep yagi ajak senteper point 59 akok aser tenatisa tanabuba set nung kanga meranga toktepa mapang point tenet tashi atonga ngua liasü.

Taoba round nung Satwik aser Chirag nati Indonesia nung tarep Fajar Alfian aser Muhammad Rian Ardianto na 21-13, 21-13 agi minute 41 nung akok aser semifinal tongteta liasü.

Neeraj Chopra Diamond League Lausanne Leg nung asayatsü



Neeraj Chopra

Aami/June 17, 2023 (Agencies): World No 1 javelin thrower Neeraj Chopra, shiba tetsü yiruba ajanga masayai lir, pa June 30 nü nungi tenzüka asayatsü aliba Wanda Diamond League, Lausanne nung asayatsü imlar.

Iba asayamung dak sendakba nung reigning Olympic champion yagi kecha osang magütsü, ajisüaka iba tetoktepa official website ajanga ashiba agi, India

nung asayar ya iba ita tatemi asayatsü aliba asayamung nung shilem agiba angütsü.

"Javelin asaya nung India nung Olympic champion Neeraj Chopra, Czech nunger Jakub Vadlejch aser Germany nunger Julian Weber amala asayar den tokteptsü," ta website nung shia lir.

Chopra-i taoba ita Twitter ajanga pa training agiba mapang tetsü yiruba indang metetdakja

liasü, aser kümdangshia alitsü atema Netherlands (June 4) nung FBK Games aser Finland (June 13) nung Paavo Nurmi meet nung shilem magütsü atema telemetba agiogo, ta metetdaksü.

Arishi küm 25 taina asayar ya tang Bhubaneswar nung asaya aliba National Inter-State Senior Athletics Championships nunga shilem magir.

Maneni pa Czech Republic nung June 27 nü Golden Spike Ostrava nung asayatsü renemer liasü, ajisüaka tang tashi official osang agüja mali.

Neeraj Chopra-i taküm May 5 nü Doha Diamond League nung nület 88.67m tsüteta gold medal angua aser season kanga junga tenzüka liasü.

Kasa mapang nung taküm August 19 nungi 27 Budapest, Hungary nung World Championships asayatsü lir, koba Diamond League Finals aser Asian Games den külemi taküm asayamung tongtibang rongnung ka lir.

All Nagaland Inter College Basketball Tourney tembangogo

Dimapur, Aami/June 17 (TYO): All Nagaland Inter College Basketball Tourney Hokolbarnü tembangogo. Iba asayamung nung tetsür aser tebur Basketball asaya Kohima Science College aser Immanuel College Dimapur nati koka liasü.

Iba asayamung ya Department of Youth Resources and Sports, Government of Nagaland-i senotsü teyari agüja Dimapur District Basketball Association-i ayongzüka asaya

aser asayamung shibangba sentong nung MLA and Advisor, Youth Resources and Sports Keoshu Yimkhiung liasü.

Asayamung nung takoker nem senpet sen 40,000 aser runner-ups nem senpet sen 25,000 agüja liasü. Semi-finalists Tetso College aser Unity College (tetsür), aser SASRD o Oriental College (tebur) nunger nema senpet sen 10,000 agütsü aser MVP tem nem senpet sen 10,000 den taok marok aser kuli kaket agütsü.

All Nagaland Inter College Basketball Tourney result:

Tetsür:

Champions - Kohima Science College

Runner-Up - Sazolie College

MVP - Sosenteta

Tebur:

Champions - Immanuel College

Runner-Up - NIT

MVP - Visito Meyase.

Habas Mohun Bagan Super Giant nung denogo

Aami/June 17, 2023 (Agencies): Indian Super League (ISL) club Mohun Bagan Super Giant-i Hokolbarnü sangdong ka ajanga club indang Technical Director asütsü asoshi taoba head coach Antonio Lopez Habas shimba sangdongogo.

Habas ya ISL 2021-22 season nung ATK Mohun Bagan indang head coach liasü aser tang ano iba club-isa meyipa aruogo.

"First team tashi tait ka yangluba den Mohun Bagan Super Giant-i, arishi küm tatakzük team balala nungi first-team nungi asayatsüpurtem anitetsü nükjidong nung lanur asayar anitetsü atema rangloker inyakner. Habas ya

team ajak indang technical director asütsü. Development side ya tang Calcutta League atema training agiba mapang ka lir," ta club sangdong ajanga metetdaksü.

Spain nung coach ya ISL titles an abenba mezüngbuba head coach lir. Pa mezüng 2014 ISL edition nung Atletico de Kolkata coach liasü aser ISL title abenba mezüngbuba head coach aküm.

Iba sülen pa FC Pune City nung oa inyak aser 2019-20 season nung ATK FC-i meyipa arua ISL title tanaben aben. Iba sülen taruba season pa lenisüba nung ATK Mohun Bagan asaya aser parnok final tonga asaya liasü. ISL 2021-22 season tom nung pa Mariners den pila liasü.

Bangladesh team nung Afif aser Naim na züngoksemogo



Afif Hossain & Naim Sheikh

New Delhi, Aami/June 17 (Agencies): Taruba ita Afghanistan den ODI asem asayatsü aliba atema Bangladesh-i team nung asayatem kar melenogo.

Ireland nung home aser away series atema tawa meshimba sülen lower middle-order batsman Afif Hossain team nung tanaben züngoksemogo. Kasa mapang nung Naim Sheikh, shiba tatamsa 2021 küm Sri Lanka den ODI asayaba mapang asaya liasü pa-a team nung züngoksemogo.

Afghanistan den masaya tsüingda item asayatem anioka team akangshitsü atema Bangladesh team inyaksangshia arudar.

Tawa tembangba domestic 50-over tetoktepa; Dhaka Premier League nung kanga junga asayaba sülen tena team nung aniokogo.

Arishi küm 23 tain Naim ya iba asayamung nung run timtiba yangluba asayar liasü. Pai asaya 16 nung run 932 yanglua liasü.

Kasa mapang nung Afif-ia, champions Abahani Limited

atema kanga tongtibang shilem agia asaya 15 nung run 550 yanglu.

Pace bowler Taskin Ahmed yiruba ajanga Ireland tour nung shilem magitetba sülen tang team nung züngoksemogo.

Afghanistan den Test ka asayaba mapang Taskin-i kanga junga asayaogo aser pai tanabuba innings nung run 37 agütsür wicket 4 agia liasü.

Batsmen Rony Talukdar, Yasir Ali, aser pacer Mritunjay Chowdhury nung parnok aseme melenogo.

Afghanistan den July 5, 8 aser 11 nü ta ODI asaya asem asayatsü aliba ya Chittagong nung dang asayatsü. Maneni Afghanistan den Sylhet nung T20 ana asayatsü koba July 16 nü tembangtsü.

Bangladesh ODI squad: Tamim Iqbal (capt), Liton Das, Najmul Hossain, Shakib Al

Hasan, Mushfiqur Rahim, Towhid Hridoy, Mehidy Hasan Miraz, Taijul Islam, Taskin Ahmed, Ebadot Hossain, Mustafizur Rahman, Hasan Mahmud, Shoriful Islam, Afif Hossain, Naim Sheikh.

BILEMDANGANG

"Na asoshi kechi aija ali ajibo naisa agütsü."